



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tir_yimyim

tir yimyim

TAPAK 7

2024 nungi tang tashi nung Maoists
532 tepsetogo: Vijay Sharma

Bangladesh nung BNP-i sorkar akumtsü,
ajaki Tarique Rahman dak rangloker

VOL. XXIII ISSUE NO. 122 (ADOK 122) DIMAPUR KÜPTOKNÜ (SATURDAY) TSÜKLAI (FEBRUARY) 14, 2026 ₹ 5.00

MGNREGA tanaben shilua bener arutsü Mokokchung DCC-i akanger

Mokokchung, Feb. 13 (TYO): Congress sarkar mapang yimdak yimtsüng nung alir ayangertem atema teyari agütsütsü yangluba sentong Mahatma Gandhi National Rural Employment Guarantee Scheme (MGNREGA) 2005 yanglur aliba BJP-i aniba Modi sarkari Viksit Bharat - Guarantee for Rozgar and Ajeevika Mission (Gramin) (VB-G RAM G) Act, 2025 ta nüngja melenshir inyakym tasen ka tenzüka aotsü merangba anema mepelaba sayua 13th Feb nü Mokokchung District Congress Committee-i DCC office Mokokchung nung osangzüür senden ka ayongzüka liogo.

MGNREGA sentong ya 2005 küm taoba Indian Prime Minister, Manmohan Singh aliba mapang tenzü. Iba mapatong yagi talisa yimdak yimtsüng nung aluyimer ayangertem küm nung anogo 100 job card agütsür inyakdaksü, iba scheme ya arur külen yimdak yimtsüng ajak kanga renloka melenshia ao. Iba ya aginba ajanga yimdak yimtsüng nung alirtem taküm jenjang ajemreptsür aser taküm ka tepsetba den saku lir, ta DCC Vice President, L. Yanger Lemtur-i metetdaksü.

BJP-i aniba centre sarkari küm 11 tashi nübur nem tagütsütsü tim magütsüi aruba agi parliament nung opposition Congress party-i asüngdang, aji oda, parliament nung o lemtep junga magi-i iba act tasenba ya renematok, anungji, Congress-i iba anema akangkanga noktaker, ta pai ashi. Sarkarji nübur atema dang alir, nüburji sarkar atema masü, ta paisa shisem.

India lima yimdak yimtsüngtem nung iba scheme ajanga makamaiter timtemer jenti tajangzüük ngua aru. India lima asadanga nung rural area nung ayanger 68% shi lir, anungji, iba timtem reprangteta iba scheme ya yangluba lir. Süra MGNREGA ya aginra nübur koda asütsü, ta pai ashi. Nagaland nunga tangutsü aliba sen crore noklang ka dak tali sota lir, ta paisa shisem.

Kechi timtem ajanga iba scheme ya agiin? Aluyimer ayanger tia ya kong toksür? Iba scheme ya nübur asoshi taküm lenmang tulutiba aser tongtibangba lir, anungji, nüburtemia iba atema ola adoktsüla. "Congress party-i makamaiter, timtemer, aluyimer aser ayangertem atema aria bilemtsür, anungji, iba scheme ya tanaben meyipa bener maru tashi Congress party-i nübur asoshi tatem tashi noktaksü", ta paisa

shisem. MGNREGA nungbo centre-i noklang nung noklang agüja aru, saka tang tasen yanglushiba VB-G RAM G Act, 2025 nungbo ter shilem (10%) state-i agütsütsüla. State sarkar sentsüh crore aika lir. Süra state sarkari 10% ji kong nungi agütsütsü? Tejenba scheme nung küm nung anogo 100 ayangtsübaaji na temeten liasü, aser yamaji meinyakra okadaki bener aotsü na temeten liasü, tangbo yamaji masü. Tang scheme tasenba nung ya asen temeten aika agiinogo, ta DCC Vice President, I. Tamsü Jamir-i ashi.

Mahatma Gandhi-i Naga nunger puküm, pai Naga nunger asoshi taküm tenlatsü mulunga liasü, linük tebu tenüng intoker tang Act tasenba nung "RAM" tenüng bener arubaji koda? India ya secular country lir, anungji, ibai khen aroka bilemdangtsüla, ta pai shisem.

Indian National Congress Tir, Mallikarjun Kharge aser Lead of Opposition Rahul Gandhi nadi anir MGNREGA nüngja melenba den inyakym tasen bener aotsü merangba anema tang India lima ajunga nung lungkak aitba sentong balala ayonga agidar. Küm 20 tashi MGNREGA ajanga sensakertem tajangzüük balala agütsüba scheme ka Modi sarkari ibaji anentsüogo. Tang act tasenba nung ya asen mapa inyaktsü aser ayangtsü temeten agiinogo, Gram Panchayat (Village Council) tashiji contractor keti aitsü, aser state sarkar senotsü tebilemtsü tulu asütsü, iba nung ya nübur asoshi tetsükdaksü aika lir, anungji, iba ya tim masüa ta sür Congress Party-i noktaker. Congress-i aluyimer aser sensaker asoshi noktaka aru, tanüa yamaji noktaksü, ta DCC General Secretary (Admin), Tamsü Imchen-i metetdaksü.

MGNREGA ya India nunger ayanger asoshi küm 20 dak tali taküm lenmang liasü, MGNREGA yagi kibong 4.6 crore nem mapa (employment) agütsü, MGNREGA tenzüker külen 180 crore anogo mapa yangertet, 10 crore alang yimdak yimtsüng nung terenlok inyakogo, aser MGNREGA ya India nung takok ngua inyakba sentong ka lir ta tebushitetba kuli lir. MGNREGA tanaben akhi ama shilua bener arutsü asoshi tim meratem agiyonga aotsü, ta DCC General Secretary-isa metetdaksü. "Onoki nübur dak tamang akar, nübur olaji kanga tongtibang lir, kenübo ibai takok angutsü imlar", ta paisa shisem.

Maova yimtsüng nung ki o jen rongtsü, tensa azüoka lir

Dimapur, Tsüklai/February 13 (TYO): Ali mangatettep nungi tensa tia tamajung kuma Dimapur nungi kilometer 30 shi pilar Maova yimtsüng nung long agi ontepa raratepba mapang sorkar ketdangsür ka aser police constable ka densema nisung 26 yiru.

Chakhroma Public Organisation (CPO) ajanga ashiba agi, küm ishika tejakdang nungi Maova aser temeket tesemtem nung alitsü tsütsü mangatettep adoka yangji ali alia alirtem ki o jen yangluba mesüra aluyimba maparen Maova yimdaklir meinyakdaksü.

Onoki jurila li nung temelaba makai ki o jen yanglua aliba December 25 tashinung agienang, aji mesüra tatok magütsütsü ta December 2 nü metetdaksü, saka parnoki iba osang senzüka yutsür maneni temelaba makai ki o jen yanglu, ta CPO-i ashi.

Lanur lenirtemi meina CPO ketdangsürtem yimtsüng nung tekolakba aser council chairman den jembishinü akatsü Hokulbarnü Maova yimtsüngi ao, ta CPO tir Zhato Kimho-i ashi.

Ajisüaka tetsür tem densema nisung 70-80 shi arua parnok yimtsüng tekolakba den majuruteptsü nokdanga liasü.

Yimdaklir temi long agi ona Extra Assistant Commissioner,

Medziphema, police constable ka aser lanur 24 shi yiruja tensa mejungi akum, ta ashi. Iba mechi mapang tatsüka lir lanur noklang ishika Moava yimtsüngi oa item telok ya arishi aser yimtsüng nung tekolakba (village headman)-i jurila li nung temelaba makai yanglua aliba ki ishika rongdoksü aser garia ishika raksatsü.

"Onok Maova-i mepetmesü adokdaksüi aoba masü saka village headman aser chairman ajanga yimdaklir ajungmesoa tia maka tensa ya atalok," ta Zhato-isa ashi.

Moava yimtsüng nung alirtem tebilemba ya jembishinütsüba masü saka rarateptsü sentong renemer liasü. Onok pela agizütsü melen parnoki onok dak long agi ona süng agi azütsü tenzü. Tanü onoki iba telangzüba ngua kanga süngmanga aoksar aser onok jembishinür tapet telangzüba agütsütsü, ta CPO tatong tir Sebastian Zumvu-i ashi.

Tanü atalokba ya Angami nunger ajunga aser Kuki nunger ajunga tsüngta masü. Maova yimtsüng nung alir kari item mangatettep ya kin ana tsüngta adokdaksütsü meranger, ta CPO-i ashi.

Kasa mapang Maova Village Council chairman Sutminlal

Vaiphei-i sangdong ka agütsüba nung, Maova nungi nisung kar aser Sobu Rio aser Chathe Prayer Centre tsüngta jurila li nung mangatettep adoka tenzüba nungi yimtsüng ajunga maka tensa tamajungba kumdaksü, ta ashi. Iba mangatettep nung tesendaktep kecha maliba tai maket yimdaklirtem timtemdaksü. Ketdangsür temi tensa azüokogo, saka Maova yimtsüng raksatsüba ya kanga sashira aser magizüketer, ta pai ashi.

February 13, 2026 anepdang 10:00 ako meta Chakhroma Youth Organization kübok lanir meyerijang ka jungnüa Maova yimtsüng-i aita parnoki jurila oset, ki, dokan aser gari rongdoksü. Ibai kanga junga asameyanga sentong yanglur inyakba lir, ta ashi.

Iba ken o ya mezüng CPO ajanga tezüluba nung agütsüba nung Chathe Prayer Centre aser Sobu Rio meyong ali temelaba makai agi ta tai tonglokja liasü. Maova Village Council-i iba ken o ya nisung kar tsüngta lir aser customary aser administrative mechanisms lir ta jangja-jangja telangzüba agütsü. Ajisüaka iba ken o angatetteptsü melen tesashiba kumdaksü, ta MVC chairman-i ashi.

(Maneni tapak 8 nung...)

ANATG-2015 lumia longkak aitba anena atar; Hombar nungi ano longkak aittsü

Kohima, Tsüklai/February 13 (TYO): Department of School Education nungi osang ka aruba sülen All Nagaland Ad hoc Teachers' Group (ANATG), 2015 batch-i mapang telatet makai lumia longkak aitba anena atar saka sorkar mesüra department-i regularization anogo tejangja ka mesangdong tashi maneni mener longkak aittsü sangdongogo.

1994 aser 2012 tsüngta shimba ad hoc teachers 1,166 tenüng nung ANATG batch of 2015 yagi service regularisation atema February 4 nü nungi longkak aita arur. Parnoki February 11 nü nungi tenzüka mapang telatet makai lumia longkak aita liasü.

Longkak ait tenzüker anogo tokunü buba, Hokulbarnü tesayurtemi longkak aitba tesem Directorate of School Education kimai melenshi, shirnok Naga Solidarity Park aser Capital Convention Centre, Kohima nung mena liasü.

Brehostibarnü ANATG dangi shiti ka züluba nung Principal Director, School Education, Shashank Pratap Singh-i tesayurtem dang mapa meinyakba anentsü aser pei

mapa inyak tenzütsü mepishi aser parnoki akhangba ama inyaktsü asoshi sorkari maparen tenzükogo ta shia liasü.

Iba sülen ANATG lokti senden ka Hokulbarnü mena lumia longkak aitba anena atatsü saka regularisation atema anogo tejangja ka mesangdong tashi mener longkak aittsü ajaki mulunga telemtetba agi.

Regularisation mapa maneni inyakdaksüner, saka tekeraba nung anogo tejangja ka sangdongtsüla. Tetetzü onok nem anogo ka magütsü tashi yangi adenshia alir züngsemtem mesenshitsü, ta core committee züngsem kati osangbener dang ashi.

Brehostibar aonung 8:30 ako meta shiti aruba sülen lumia longkak aitba anen, ta pai ashi.

Hokulbar nikongdang 1:30-2:00 ako meta lumia longkak aiter ka temang mejungi kuma temang anepalutsü Naga Hospital Authority Kohima-i anir ao. Pa temang tajungba lir ta ashir.

Nagaland CM aser Advisor, School Education ajanga regularisation mapa teinyakdaklir ta ashiba pela agizüker, saka January 30 tashi anogo sükzütsüba matai iba ken o tekeraba nung tembanger alitsüa

asü, ta ashi.

Züngsem aika Nagaland tesem balala nungi Kohima nung adenshia anogo toku jungogo aser core committee-i parnok dang telemtetba tajung makai pei alidaki oang ta ashitsü tasak, ta committee züngsem yagi ashi.

Temulung süa sangdong tajung ka magütsü tashi züngsem tem Kohima nung alitsü mulungtepogo, ta ashi.

Kasa mapang School Education department kübok ad hoc employees 235(Group A aser B nung 61, Group C aser D nung 174) regularisation atema screening committee ajanga asadangsü asoshi documents tali meshia Department of Personnel and Administrative Reforms nungi February 11, 2026 nü osang arua lir, ta department-i metetdaksü.

Anungji department-i nüngdakba documents agüja kaketshir mechi akhi ama mapa inyaktsü ANATG dang mepishi.

Saka ANATG core committee-i department dang service regularisation atema agüja aliba documents reprangshiba nung yariteptsü atema ANATG züngsem ter shimer yoktsü mepishia lir.

BAN-i ayongzüka comprehensive Capacity Building Program ka agi



Dimapur, Tsüklai/February 13 (TYO): Small Industries Development Bank of India (SIDBI) den longjemer Business Association of Nagas (BAN)-i tanü comprehensive Capacity Building Program ka ayongzüka agiogo.

MSME-oriented scheme tem aser credit facility tem dak sendakba nung financial literacy tajungba kümdaktsütsü aser tangazükba tali agütsütsü nükjidong nung iba sentong ayongzüka agiogo.

Training mapang EXPRESS, SPEED, ARISE, aser STHAPAN densema SIDBI indang direct lending product tem indang tangazükba agütsü, koba ajanga expansion, modernizaton, working capital requirements, aser greenfield project tem atema sen 50,000

nungi crore 50 tashi senotsü teyari agütsür.

Kasa mapang nung PRAYAAS scheme dak sendakba nung talisa tangazükba agütsüogo, koba informal micro enterprises, Green Finance initiatives, GST Sahay (invoice-based financing), aser thematic product dak rangloker lir. Iba ya tetsür, SC/ST, aser export-oriented entrepreneurs tem nongita yaritsü atema design süa yangluba lir.

Sensaksem agiba mapang sentong nung shilem agirtem nem BAN züngsemtemi rongsenketzüng renemtsüba, shishilemba balala atema sentong yanglutsüba aser institutional credit agitsü atema tenüngdakba inyakyimtem indang

tangazükba agütsü.

Maneni entrepreneur tem nem eligibility norms, digital loan applicaton inyakyim aser rongsenketzüng anepaluba inyakyim tajungtem indang tangazükba agütsü.

Sentong nung nisung 46 shi-i shilem agi. Parnok ya sensaksem balala nung shilem agiba den ken o mejangja alibatem jangjashi aser rongsen teyari asoshi lenmang koda bushitsü iba indang angazükba laisü.

BAN-isa, iba amala sentongtem ajanga entrepreneur tem maneni renloka odaktsütsü parnok bendanga agütsür aliba nenshia metetdaktsüba den züngsemtem dang SIDBI indang scheme tem takok tashi agitsü ajungshia liasü.

IDAN-i ayongzüka Capacity Building Training sentong ka agi



Dimapur, Tsüklai/February 13 (TYO): Investment and Development Authority of Nagaland (IDAN)-i ayongzüka anogo pongu atema Swavalamban Connect Kendras (SCK) manpower atema Certificate based Capacity Building Training Programme ka kanga takok ngua ayongzüka agiogo. Training ya February 9 nungi 13 tashi agia liasü.

Sentong nung Nagaland kübok district 16 prongla nungi SCK ketdangsürtem den Finance Department kübok Chief Minister's Micro Finance Initiative (CMMFI) Cell aser IDAN indang Accounts Cell nungi ketdangsürtemi shilem agia liasü.

Training mapang Income Tax Return (ITR), Goods & Services Tax (GST), Entrepreneurship Development Programme - Training of Trainers (EDP-ToT), Detailed Project Report (DPR) preparation, aser Management Information System (MIS) dak sendakba nung tangazükba

agütsü liasü.

Sentong nung I. Changsang, NCS Under Secretary, IDAN-i lokti pela agizükba o jembi. Pai, Nagaland nung entrepreneurial ecosystem tashi itshidaktsütsü atema tongtibang inyakyim ka ama Swavalamban Connect Kendras (SCK) ya koda tongtibang iba indang lemsatap. Paisa, SCK tem ya grassroots-level facilitation centre tem ama lir, koba ajanga entrepreneur tem dang len sayuba den teyari balala agütsür, ta ashi.

Sentong nungsa Abeinuo Jasmine Ashao, NCS Under Secretary, Finance Department-i, state nung sustainable entrepreneurship ajungketba mapang financial literacy, regulatory compliance aser rijutem akangshitsü koda tongtibang iba indang lematep. Maneni lai sentong nung shilem agirtem dang tangazükbatem mapa küma benoka inyaktüsü ajungshia liasü.

ITR aser GST dak sendakba nung session ya Agarwal & Associates nungi Chartered

Accountant Harish Agarwal-i agia liasü. Iba session ya tax compliance, filing inyakyim, tenüngdakba balala aser shishilemba tilateri nung entrepreneur temi tetsükdaktsü balala ajangshiba dak rangloker agi.

Maneni Nagaland dak sendakba nung ITR aser GST indang session ka Vizoto Alfred Rolnu, Inspector, Income Tax Department, Dimapur-i agütsü.

EDP-ToT module koba Entrepreneur School of Business (ESB)-i ayongzüka agir, iba yagi shilem agirtem district balala nung Entrepreneurship Development Programme tem takok ngua ayongzüka agitsü asoshi nungdaka aliba tangazükba balala agütsür.

Financial projections, viability analysis, aser credit linkage documentation densema bankable project reports renemtsü atema hands-on training AMCC branch, Kohima State Bank of India (SBI)-i agütsü liasü.

Training shibangba sentong nung Additional Secretary, Finance Department, Imtinenla, NCS alakteta jaoker liasü, shibai Nagaland ajanga nung tekübokba jenjang nung rijutem aser rongsenketzüng terenlok atema inyakyim balala ajungkettsü asoshi capacity building training tem maneni agiyonga aotsü nungdakba lemsatapa liasü.

Modern metal band Resvalni-i tanü parnok ken "Revive" sayatsü

Dimapur, Tsüklai/February 13 (TYO): Modern metal band Resvalni-i tanü nikongtsütsü 3 ako nung "Revive" ta nungja agütsür parnok indang ken mezüngbuba ken YouTube nung sayatsü.

Resvalni ya 2025 küm March ita taoba mapang nungtugu kentenba telok About Us nung lead vocalist Sochan Kikon-i tentet. "Resvalni" nungja ya "A Resolution for a Vast Loyal Nexus of

Inspirations," indang acronym lir, koba mucis ajanga nüburtem den sendakteptsü band nükjidong aliba den kanga puteper.

Iba telok ya kentenba telok ka dang masü saka parnok ajanga lokti ajungmesotsü aser longjemdaktsütsü nükjidong lir.

Band nung Sochan Kikon vocals, Tubescreamer aser Temjen Lemtur guitarist, Merithung Murry bassist aser Jerry Leivon drummer asütsü.

Inspector General AR-i Sataka nung BSF Battalion semdang

Dimapur, Tsüklai/February 13 (TYO): Inspector General Assam Rifles (North),-i February 13 nü Sataka nung BSF Battalion 'The Great Naga' semdangogo.

Battalion koda renemshia ali, tang security tensa koma ali, tang tinyakdak inyakyimtem aser civil-military tesendaktep asadangtsü asoshi pai iba Battalion semdanga liasü.

Pai sepaitem den sensak asem aser iba tesem yimjung

aser tesunep nung toktsütsü atema unit-i bendanga agütsü inyakba atema parnok nem tenüngsang agütsü liasü.

Maneni pai, kanga kümküma alitsü nungdakba aser iba tesem yimjung aser tesunep nung toktsütsü atema nüburtem aser military teka amteper inyaktüsü nungdakba lemsatapa liasü. Paisa, local nüburtem nongita yaritsü aser maneni longjemer inyaktüsü nenshia metetdaktsü.

PCC nung World Radio Day mungogo



Dimapur, Tsüklai/February 13 (TYO): Patkai Christian College (Autonomous) nung Department of Mass Communication-i ayongzüka Hokolbarnü 10:30 ako nungi tenzüka World Radio Day mungogo.

World Radio Day amungba anogo second year Mass Comm kaketshirtemi "Campus Waves" ta nungja agütsür parnoki mejemba radio jingle ka saya liasü. Iba ken ya campus radio tanüla tushiba temaitsü aser tawa tanü media landscape kanga kara meleshia aoba tensa ka nung tanüa radio ya asen tendak dena kanga peta aliba sayatsü nükjidong nung yangluogo.


Taküm iba anogomung omen ji "Radio and Artificial Intelligence: AI is a tool, not a voice," liasü aser iba omen dak ajemdaker kaketshirtemi production, editing, aser distribution nung artificial intelligence ajanga radio industry nem koda teyari agütsütettsü iba indang asadang, ajisüaka meimchir ola, emotion aser otsü ashiba yimya ya broadcasting temulung lir, ta asatetogo. Sentong ajanga technology yagi creativity nongita yaritsüla saka meimchir shisatsü nungi adokbabo memelentsü koda tongtibang

iba indang asadanga liasü.

"Campus Waves" ken ya Sharon Woleng aser Benri Murry nati aten aser Toto Achumi aser Bendangsunep Sor nati anir produce süa liasü. Mhabemo Jungio aser Tsurunkhuung Yimchunger nati ken ojang ya zülü aser ken mangaokba ya Vizaneino Kiso aser Chingri Rainam nati achaayanga liasü. Backup vocal tem rongnung Hosea Weitsi, Rangcholi G.N aser Surotsa Anar nunger densema liasü.

Ken atema music ya department studio nung BandLab amshia yanglu aser iba ajanga digital tools aser creative storytelling na longjemdaktsütsü kaketshirtemi dak tashi aliba sayur. Iba ken ajanga lanuwa tashi, campus taküm aser lokti sendakteptsütsü asoshi radio-i koda tongtibang shilem agir iba indang sayur.

Iba sentong ajanga teamwork, technical skills aser broadcasting atema arok tejangraba aliba sayur. Sensaksem, kenten aser saya balala ajanga kaketshirtemi World Radio Day amungba dang masü saka artificial intelligence putu nung radio agi tanüa koda tongtibang shilem agir iba indang nenshia metetdaktsüogo.



February 13, 2026 nū New Delhi nung Parliament kima Opposition MP temi India-US interim tezūngzüktep anema longkak aitdang tangokba noksa nung angur.

Red Fort amakba nung JeM-i shilem agia lir: UN Security Council

New Delhi, February 13 (Agencies): Yakūm November ita nung New Delhi nung aliba Red Fort nung bomb lendong atalokba nung Pakistan nung amenoka aliba kiralongrar telok Jaish-e-Mohammed (JeM)-i shilem agia lir, ta United Nations Security Council (UNSC) report ka ajanga metetdaksü.

Yakūm iba lendong nungji nisung 15 asü.

ISIL aser Al-Qaida dak sendakba nung Analytical Support & Sanctions

Monitoring Team-i Security Council 1267 Sanctions Committee nem agütsüba 37buba report nung yamai shia lir, "Züngsem State kati, amakba tatatalokba aika atema Jaish-i-Mohammed-i tenüing agiogo. November 9 nū New Delhi nung Red Fort amakdang nisung 15 asüba tatalokba nunga parnok densema lir ta shia lir."

Kasa report ajanga, October 8 nū JeM lenir Mohammed Masood Azhar Alvi-i tetsürtem wing, Jamaat ul-Muminat

amenokba sangdonga liasü, aser ibaji kiralongra nung yariteptsü nükjidong nung tentetba lir, ta metetdaksü.

"Ano July 28 nūa Jammu & Kashmir kübok Pahalgam amakba nung shilem agir asem tepsetogo," ta tanga report ka nung shia lir.

Yakūm November 9 nū Red Fort anasa gari aika senzüdak gari ka mezülongi aoba sülen gari nung aliba bomb tesashi apokba lendong nung nisung 15 asü aser aika yirua liasü.

Vande Mataram tekong 6 atentsü tuyuba CPM aser Muslim teloki ashishir

New Delhi, Tsüklai/February 13 (Agencies): Union home ministry tetuyuba ka ajanga linük ken Vande Mataram tekong trok atentsü tuyuba anema CPM aser Muslim nung teloktemi ola adok tenzükogo.

Iba tetuyuba ya agientsüla, ta takhangba agüja CPM-i sangdong ka ajanga, "Tawa sorkari tetuyuba ka ajanga tanüingba tekong pezüa atentsü tuyuogo, saka Constituent Assembly-i ibaji India Republic nung secular den meputep ta bangjema liasü. BJP-i aniba Union sorkari nükjidong yur nüngdak makaba nung linük ken aser linük naklu ken ajanga mangatettep adokdaksütsü meranger," ta metetdaksü.

Iba ken nung tekong pongububa ya Bankim Chandra Chatterjee indang kaket Anandamath, nungi agizükba lir, aser iba tekong

nung Hindu nung tetsür tsüngremtem nem tenüingsang agütsüba lir.

Ano külen Jamiat Ulama-i-Hind nung tongti, Muslim cleric Arshad Madani-ia X ajanga, "Muslim nung kati Allah dang külemer, anungji kangshia pa nem iba ken tendaksüba ya linük temzüng kübok Arrla 25 anema lir aser Supreme Court indang obendang aika den meputep. Ajak nem iba ken tendaksüba aser sensotem matsüngdang kangshia benoktsü merangba ya linük meimba masü saka politics asayaba, telemsa adokdaksüba aser tanga tongtibang onüktem nungi nüburtem piladaksütsü merangba mapa ka lir. Linük chichia meimbaji yimiyim ajanga masü saka jakla aser tenlaba ajanga dang asadanger," ta metetdaksü.

All India Muslim Personal Law Board general secretary,

Maulana Mohammed Fazlur Rahim Mujaddidi-ia, Constituent Assembly nung Vande Mataram ken nung mezüngbuba tekong ana dang atentsü atema bangjema liasü, anungji secular sorkar kati yimsü ka indang tamangbaji tanga yimsü amangertem matsüngdang kangshia benoktsü makok, ta ashi.

Rahim-isa, iba ken ya Bengal den sendaktepa zülü aser iba ken nungji Durga aser tanga tsüngremtem külemba indang lir, ta metetdaksü.

Taoba mapang bureaucrat aser MP, Jawhar Sircar-ia Facebook ajanga, "Rabindranath Tagore-i Bankim Chandra ya pa tesayur ama züngshia liasü, ajisüaka paia Congress dang Vande Mataram nung tepor tajung mezüngbuba tekong anaji dang agizükang ta metetdakja liasü," ta ashi.

PM Modi-i BNP Tir Tarique Rahman nem tenüingsang agütsü

New Delhi, Tsüklai/February 13 (Agencies): Hokolbarnü Ato kilonser Narendra Modi-i Bangladesh Nationalist Party (BNP) Tir, Tarique Rahman-i aniba party-i Bangladesh parliamentary elections nung takok anguba atema pa nem tenüingsang agütsü.

Ato kilonser Narendra Modi-isa Bangladesh nung democratic sorkar aser ajak züngokba sorkar India-i maneni nungita yarisü, ta metetdaksü.

Modi-i X ajanga, "Tarique Rahman leniba nung Bangladesh Parliamentary elections nung BNP-i takok tulu anguba atema pa nem tenüingsang agütsü. Iba takok ya ajanga Bangladesh nung nüburtemi nü lenisüba dak mulung alemba sayur," ta metetdaksü.

Modi-isa, "Lenla balala nung tesendaktep tashi itshitsü aser külem nükjidongtem ataloktsü atema nü den külemi inyaksü yongyar," ta metetdaksü.

Bangladesh election nung BNP-i two-thirds majority agi takok ngua liasü. 2001 küm elections nung BNP-i menden 193 nung takok ngua liasü saka tan election nungbo parnoki menden 200 dak tali nung takok angu.

2024 küm August ita nung nüburtemi longkak aita Ato kilonser, Sheikh Hasina-i aniba sorkar atsüngdokba sülen ita aika yimtenren tashi meiti aruogo, saka tang democratic sorkar tasenba ajanga tensa tajungba akümtsü aser yimtenren tashi aitsü imlar.

Rahman ya BNP tentetsang aser taoba mapang Tir, Ziaur Rahman'er jabaso lir aser pai Ato kilonser tenangzükba agitsüa akok.

Pa bendanglen küm 18 tashi aliba sülen yakūm December ita nung ang Bangladesh yimtiba, Dhaka-i meyipa arua liasü. Pa tebui 1977 küm nungi küm aika Bangladesh yimsüsüa aruba mapang 1981 küm tepseta liasü.

2024 nungi tang tashi nung Maoists 532 tepsetogo: Vijay Sharma

New Delhi, February 13 (Agencies): Hokolbarnü Chhattisgarh Deputy Chief Minister, Vijay Sharma-i, 2024 küm January ita nungi tenzüka tang tashi nung state nung Maoists telungpur 532 tepsetogo, 2,004 puogo aser 2,700-i surrender süogo, ta metetdaksü.

Takūm March 31 tashi nungbo sorkari Maoists samatsütsü, ta pai metetdaksü.

Osangbenertem den jembidang Home Department portfolio-a repsema abensang Sharma-i, security sepaitemi mita aoba aser surrender asüba telungpurtem nem teyari agütsüba ajanga Maoists anema raraba tongbang nung takok tulu ngudar, ta metetdaksü.

"March 31, 2026 anogo tashi nungbo Chhattisgarh nung Maoists samatsütsü nükjidong yur state sorkari inyaker," ta pai ashi.

Sharma-isa, security sepaitemi telungpurtem indang prangpong 1,100 puogo, aser item prangpong rongnung AK-47 rifles, INSAS rifles, self loading rifles, light machine guns, mortars aser pistols

densema lir, ta metetdaksü.

"Maoists nung Politburo aser Central Committee züngsem trok tepsetogo aser anati surrender süogo. Special Zonal Committee züngsem 17 tepsetogo, teneti surrender süogo aser ka puogo," ta paisa metetdaksü.

Kobi melii telungpur apuba dang nungibo surrender asürtem teimba akümtsü, aser ibaji jangratemtsüka lir, ta pai ashi.

"State nung rehabilitation centres tenet lir. Tang tashi nung tetsür 410 densema taoba mapang telungpur 1,700-i item centres nung skill training renemogo aser tang training tagidakpur 232 lir. Surrender asüba telungpur ajak nem mobile phones densema osettsüet balala agütsü," ta Dy. Chief Minister-isa metetdaksü.

Surrender asürtem atema Aadhaar, ration aser Ayushman cards renemtsü, ta pai ashi.

Jagdalpur, Saraipali aser kidanger state tem nung aliba radio stations ajanga telungpurtem dang surrender asütsü ayongzüker, ta paisa shisem.



February 13, 2026 nū New Delhi nung Ato kilonser, Narendra Modi-i Prime Minister's Office complex 'Seva Tirth' semzüktsüdang tangokba noksa nung angur.



Regional Office, Jorhat, Crystal Enclave, Seuni Ali, Borpool, A T Road, Jorhat-785001 (Assam)

ADVERTISEMENT

Bank of Baroda-i Kiphire, Dist: Kiphire, Nagaland nung Branch tasen lapoktsü aser iba nungji ATM premise, Solar Palen install asütsü aser power teperi atema kiburtem/Power of attorney holders dang nungi offers meshir, talisa Ground Floor nung tasazük 1200 - 1500 sq. ft. tesem aginer. Ita ana tsüngda premises ji atsünga agitsü atema renema alitsü mesüra atsüngtsü atema renema alitsüa akok. Offer agütsütsü tebilemba alirtemi parnok indang offer ji temeja 'sealed cover' ana nung superscribed Technical bid aser Price bid ji March 6, 2026 anogo tashi nungbosa Assistant General Manager, Bank of Baroda, Jorhat Region, Crystal Enclave, Seuni Ali, Borpool, Jorhat - 785001 nem agütsütsüla. Talisa Public Sector Units / Govt. Departments meyong premises nem maongka agütsütsü. (Osang tejangjaba atema onok indang website www.bankofbaroda.bank.in nung aliba tender section nung reprangang). Kuli kecha magütsüi offer agizüktsü mesüra magizüktsü temeden bank dak keta lir.

Date: 14.02.2026
Place: Jorhat

Sd/- Assistant General Manager
Jorhat Region



TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 14, 2026

Tesayutem nem akhüm agütsütsüla

Kin ka yangerba nung inyakertem tongti purtemji tesayurtem lir, anungji parnoki parnokji pei kin asoshi tongti shilem agir tongtibang lenirtema ta bilemstsüla aser asenokia parnokji akhümtsübutsüla. Ajisüaka, asen lima nung taoksatsü aser tebilemdangtsü kaji, tesayurtem aikati pei mapa nung temulung magütsür aser libaliru nunga tesayurtem ama malir. Ano külen, kaketreju nung tanurtemi pie tesayurtem nem akhümtsübu agütsüba dak alaka loktiliba nung nübortemi tesayurtem akhümtsübu amshiba kangabo mangur aser ano kangasa tia majung kaji, government-ia pei tesayurtem tezümedangdaktsüi tajungba-tajungba kümdakja anepalua amshitsü melen tesayurtem ya pei kija ajangzüksü asoshi amshitsü ayuba oset amai ka dang amshir. Aji oda, Nagaland nung government school-tem majung tenzüka ya, government nung alirtemi election mapang parnok masemer tesayurtem nem temerenshi agütsür amai tesem talangkati 'transfer' yoktsü aser election nung parnok asemertem bener arutsü ta tesayurtem agi 'ball' amai kümer government inyakima kecha mali ama, pei sünütsü süa metsüshiba len nungi tesayurtem asoshi school nung tanurtem dang lesson sayutsüba dang nungibo election nung shilem agitsübjang tongtibangba aküm. Iba jagi tesayurtem aika mulungjang nung school nung tanurtem dang sayutsü jangratsü melen election nung shilem agitsü aser election temer MLA mesüra minister den senzütsü-ang tejangraba aküm. Atangji, tangatetba aser tejangraba tulu nung küm nung 'leave' a kenüa magii school nung tanurtem dang bendanga agüja sayur ka, election temer tesem talangkati transfer yok nung, iba tesayur mulungjang nunga kechi bilemstsü ? Ibaji dang masü saka Nagaland nung kaketrejutem ya tanurtem shisaliok tajung angazükdak tesem ka küma yangertsü melen pei nisung aser kinungertem ita sen chia amongdak tesemang ka amai bilema, tesayutsü ajung-majung memetet aser metendang ser tapi agi election nung pei yarir aser kinunger apia government nung alirtemi tesayur pei shimnütsü shimba agi, tang tashi küm ter dak tali inyaker tesayur 1166 tashi mapa nunga manentsü aser mapa nung regularise a mesütsür ta kangshidaktsüba angur. Ibai meimlaba tebilemstsü ka agi atonger masü saka tarutsü nung tebilemstsü ajurutsü ta metetsümonga government nung alirtemi inyakba mapa ka lir. Ashiko, ibai election nung yaritepba aser kinunger asüba tsütsülen nungi government inyakim ajak paidoka tenük amur inyakba mapa ka asütsüa akok. Atangji, government nung alidang yimten tashi amshia government mapa nung nisung mashi mashi anioktettsüa akok, saka government mapa nung nisung anioktetbaji masü saka parnok nemji mapa aser ita sen agütsütettsüla. Tanü Nagaland nungbo school-tem nung dang masü saka tanga government office-tem nunga inyakertem aika shima lir saka parnok asoshi mapa maka aser ita sen agütsütsüa maka ta nisungtem timtemdaktsüba angur. Iba amaji mesüi, yimten nung yimsüsürtemi pei yangluba temzüng ozüng aser inyakim kübok maparen ajak tipdema shitak inyaka ao asübo, tanü kaketrejutem nung tesayurtem shima yur küm ter dak tali süa regularise mesütetba tebilemstsü aser timtem ya majurula. Aji oda, tamalen Nagaland nung yimten yimsüsürtemi school tesayurtem ya ball amai metsüshia "political transfer" yoka mamshii akhümtsübu amshi asübo, tanga government school-temsa tajungba süla aser küm ter dak tali mapa inyakdaktsür regularise mesütsütetba tebilemstsü ya majangshila. Ya ajak ya yimten nung yimsüsürtemi inyakim shitak lateta yur iba inyakim sülen anidaka meinyakba ajanga atalokba timtemtem lir. Atangji, iba mapangba ya maparen ajak nung Nagaland yanglushitsüba mapang lir.

OLEMSABANG

“Tama” tetezü agi mashiyim kümdakja bendenlokba Ojangdem

T. Meren Paul, Kohima

Asen Ao oshi nung “Tama” ta asübaji mezünpuba asüba dang ajar aser tajunglen amshir. Tatishitsü agi- tamasa, tamapur, tamaren, koba agi tama ta asüba tetzüji jangja jangjaa rateta tuyur. Saka tama sülenji bendenloksemba ojang karibo “tama” tetezü mashiyim yim nung amshir aser ratettsür (negative aspect). Tatishitsü agi tamagitsü ta sürabang ajak dang tamasa agitsü ta masü saka tamasayongi magitsü oset dang tamakitsü ta ajar. Asenok terongdong tekongnem kübok tapu ana yongtsü asenoki tekabo agi madong mamshiba tesem dang tamanakshi ta ajar, tetezü tamasayongi manakshidak. Yamaji amshiba ojangdem yangi ni metetba aser bilemtetba bendena lanur rogo asoshibo tajangzüc ngudisü ta zülutsür. Idem dak alaka ano alitsü. Arok Osep nung amsema alibadem AO ta sayur.

- * Tamabentsü – meyamena, tashipangtsü osettsüset, mapentsüla kechiserna abenba
- * Tamachi – nüji nüblem masü, mabensa nisung, AO
- * Tamachitsü – kodanga machitsüla, tamasayongi machitsüla
- * Tamadangtsü – süngjanglijang mazükmaru madangtsü yim dangtetba, kodanga madangba
- * Tamadongtsü – mebilemba, meyimlaba taoksatsü mapa/osang tulu agi adongba
- * Tamadok – samaba, pa sasah oadokba
- * Tamah – amadokba, mebilemtetba
- * Tamaittsü – tamasayongi maiteptsü asoshi ayak enokba, AO
- * Tamajilutsü – meinyaktsüyim, mashikoshi mapa, meyimteploktsü mapa
- * Tamaulu – tamagitsü nung uluba
- * Tamajembitsü – mejimbitsüla o jembiba
- * Tamajemtsü – tamasayongi mesodak majemtsü yim, tat; yi amala, meyim mozü
- * Tamajung – tajung masu, tagitsü majung, AO
- * Tamajüzü – tashibangtsü majemoktsü len juzüba
- * Tamagitsü – tagidak maka, tamasayongi magitsü oset, AO
- * Tamakatsü – kodanga makatsü oset, par asoshi kodanga metuzüktettsü oset
- * Tamakangtsü – masüngdangtsü, memeshitsü yim tamakoktsü akhangba, AO
- * Tamakok – takok manguba, meinyaktetba, AO
- * Tamakoktsü – koktettsü mapa masü, meinyaktettsü yim
- * Tamakoyatsü – samesa menenpuyatsü, tashibangtsü, atetapongtsü
- * Tamalemtsü – lemsa ah mgitsüla oset, tat: arok yimden meyong
- * Tamalitsü – meyamena aketba shiruru, oset tamasayongi malitsüla yim
- * Tamamangtsü – tamangtsü maketba osang, mataloktsü atalokba, AO
- * Tamangutsü – mangutsüyim repringshiba, tat: tanuri tzürabur oset anguba, tsüngrem anguba, AO
- * Tamanguba – nisung nüc agi manguba, tat; Tsüngrem
- * Tamanakshi – tekabo agi madongdak terongdong tapu ana ajurutepdak tesem, AO
- * Tamasayu – mesayu mazüok tanur, tashi manga, AO
- * Tamashi – shisatsü meperi, shisa maka, AO
- * Tamashir – shisa makar nisung, AO
- * Tamashiotsü – menügdakba lendong aketba nisung den metetpelaba
- * Tamashitsü – mangazüktsüyim mapa tamajung angazükba
- * Tamashitsü – tangardak matongba tashidak, memetetba tashidak atongba
- * Tamashishitsü – meyim mapa, tangar dang ashitsüla masü
- * Tamashiyih – tangarden liru majem shisatsü, tamagitsü shisa
- * Tamasepba – kodanga meremsepba, masepba
- * Tamasotsü – tanur saloksara asoba
- * Tamasüba – kodanga masüba, masütsü, AO
- * Tamasütsü – tangar asüba yim agi masü saka menena asüba
- * Tamaotsü – maotsüla tesem mesüra lokdi
- * Tamatari – bankabanglema pangdaka ayuba
- * Tamatangshi – metangshitsü nung tangshiba, tat: teburi tetsür meyim oset nung dangshiba
- * Tamayazü – tamasayongi yazüyapong maket, mezüng yongi tsüngchir, AO
- * Tamayazür – tsüngchir, ochishir nisung, AO
- * Tamayitsü – mejilutsü yim,
- * Tamayoktsü – nüngo oset yoka achila oset masü, tat, Laishiba nung Nabot-er tsükmenatsü lu amala
- * Tamayongtsü – süngo ama ajemla aser mayongtsü masü
- * Tamayutsü – miyamena aketba kidang mayutsüla oset tsüset

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Meghalaya CM Conrad Sangma nem CBCI national award agütsü



February 09, 2026 nü Catholic Bishops' Conference of India (CBCI)-i Meghalaya Chief Minister, Conrad K. Sangma nem CBCI National Award agütsüba sülen tangokba noksa nung angur. Bengaluru nung aliba St John Medical College nung ayongzükba CBCI 37 buba lokti senden nung Sangma densema nisung 19 nem iba award agütsü.

February 13, 2026: February 09, 2026 nü Catholic Bishops' Conference of India (CBCI)-i Meghalaya Chief Minister, Conrad K. Sangma nem tang tasen tentetba CBCI National Award agütsüogo, ta osang ka ajanga metetdaksü.

Nübur junga tenzükba aser linük yangerba nung shilem tajung agiba atema CBCI-i pa nem tang mezüing iba award agütsü.

Bengaluru nung aliba St John Medical College nung ayongzükba CBCI 37buba lokti senden nung Sangma densema nisung 19 nem iba award agütsü.

Iba award ya taküm mezüing agütsür. Mapa agi pei tamang sayuteta inyakba, shisaliok tsütsü shilem tajung agiba, pastoral lenisüba aser bendanga agüja tenzükba yimsü lenirtem nem iba award agütsü.

CBCI-i, "India nung Catholic Chief Minister ka ama pai (Sangma) pei tamang kuli süa sayuogo, ochishia inyaker aser nüburtem nendaka tenzüker," ta metetdaksü,

Iba sentong nungji Metropolitan Archbishop of Thrissur aser CBCI Tir nungi anensang Andrews Thazhath aser CBCI General Secretary, Archbishop Anil J.T. Couto nati Sangma nem tenüngsang agütsü.

"Loktiliba nung lenla ajak liromedema aintsü nükjidong yur pai inyakba aser lanurtem nem tashi agütsütsü atema nendaka inyakbaji pelaa agizüker," ta lenir anati Sangma nem tenüngsang agütsü.

Iba sülen Sangma-i X ajanga, "Iba sempet agütsüba atema ni ajemalushir aser pelar. Meimchiri inyakbaji telatet ka dang ajisüaka Tsüngremi inyakbabo asadangtsü makok, ta meteta ni iba sempet agizüker. Ni kechi inyakteter, ibaji Tsüngrem taochi, Pai agütsüba

shisatsü aser tasütait tanela ajanga inyakba lir. Ano len talang jajatsü lir, saka sarasadem aser nükjidong yur inyakba ajanga ajakji takoktsü," ta metetdaksü.

Chief Minister-isa India nung, talisa Northeast nung lanurtem atema Catholic Arogoi mapa tajung inyakba atema pelaba metetdaksü.

Tanü India nung aliba Arogotemi timtem balala ajangshiba dak sendakba nung Sangma-i maneni Arogo den amalitepa inyaktsü, ta ashiba den külemi pai Khristan lanurtem dang yimtenren nung lenirtem dang masü saka lenla balala nung lenirtem akümtsü nükjidong yur inyakang, ta ayongzüka liasü.

Chief Minister-isa pa atema sarasademtsüba aser pa ajungmesoba atema Arogo

nung lenirtem- Cardinal Poola Anthony, Metropolitan Archbishop of Hyderabad aser tang CBCI Tir teinyadak; Archbishop Andrews Thazhath; Cardinal Filipe Neri Ferró; Mar Baselios Cardinal Cleemis; George Cardinal Koovakad aser Major Archbishop Mar Raphael Thattil nunger dang pelaba lemsatep.

CBCI ya 1944 küm tenteta liasü, aser iba tentet ya India nung aliba Catholic bishops tentet ka lir. CBCI nung India nung aliba Latin, Syro-Malabar aser Syro-Malankara Arogotem indang diocese 174 nungi bishop 257 densema lir.

CBCI-i pastoral mapa nung yariteper aser shisaliok, healthcare, loktiliba nung temeden balala ajungkettsütsü aser minorities temeden atema inyaker.

2033 küm tashi nungbo Khrista

Seoul, February 13 (Agencies): Tawa South Korea yimtiba, Seoul nung World Evangelical Alliance (WEA) senden nung alima tesem balala nungi lenir 5,000 shi aden, aser parnoki 2033 küm tashi nungbo Yisu Khrista osangtajung agi meimchir ajak ayimjemtsü atema asentenshir tenangzükba agiogo.

2019 küm Indonesia nung senden aliba sülen-a züngsem linük 27 bendenlokogo, aser tang iba organization nung linük 161 lir. Item linük teimbaka Africa, Asia aser Central Asia nungi lir. Tang alima nung evangelical Khristan shilem 70 dak temabo Africa, Asia aser Latin America nung lir.

Akhidangbo North nungi missionary tem South tsütsüleni oa liasü saka tangbo Asia nungi missionary tem America aser Europe-i aoer.

Tatishitsü agi, mapang ka nungbo South Korea ya mission field ka dang liasü,

ajisüaka tangbo missionary teimba yokba linüktem rongnung Sotuh Korea ya tanabuba jenjang nung lir.

2033 küm tashi nungbo alima tesem ajaklen Khrista osang proker alitsü WEA nükjidong lir, 2033 küm ya Yisu Khrista tasü nungi shia aruba sülen küm 2000 ajungba küm lir. Ajioda WEA-i Arogotem dang 2033 küm tashi nungbo meimchir ajaki Khrista osangtajung angashir alitsü nükjidong yur inyaktsü ajungshir.

WEA Executive Chair, Dr. Goodwill Shana-i, "Alima nung nütsüng shilem 60 bo yangi Asia nung lir. Alima nung Muslim nütsüng teimba aliba linük-a yangi Asia nung lir, Hindu aser tang yimsü nütsüng teimba aliba linüktem yangi Asia nungsa lir. Alima nung nütsüng shilem 60 bo yangi lir, anungji asenoki Asia atema kanga sarasademtsüla," ta ashi.

2033 küm tashi nungbo iba

ANO GO ABEN TSÜNGREM DEN

Amajok Nung Timtem

"Arung, asenoki Kibuba dangi meyipdi kechiyong pai shisatsü, aser pai asenok aneptsütsü. Pai azük aser pai asenok aleptsütsü" (Hosea 6: 1)

"Kechiba tajunger dak tamajung ataloker?" Iba tasüngdangba ya temulung süa melangzür. Laishiba nungi Tsüngrem yimya angatetba ajanga iba miim o lapoktsü sapi agütsür.

Ajaki Tsüngrem tenüing meteta lir. Jehovah-Jire aser Jehovah-rapha. Saka tenüing ka ajanga Pai pasasa jungkai adok. Jehovah-Makkeh, tetezü, "Ni Kibuba shibai azüker apushitsür" (Ezek. 7:9)

Tsüngremi metongshitsüba temoatsü indang Yob tembar kati ashi, "pai yirutsüaka, Pai ano aneptsü. Pai azüker saka pa teka agi aneptsür" (Yob 5:17-18). Anüngdang aser aonung anapronglaji Tsüngrem meyong (T. Ken 74; 16). Tsüngrem yimjung anogo, aser tokrong anogo: kata kata yanglu (Sayu 7: 14). Tajung aser tamajung ajak tematiba nungi lir (Aiatai 3:38).

Ibri tapu ajaklen Khristanem asoshi tapet lir. Khristan takümüji tasemtepba ka lir (Ibri 12: 1). Tasemtepertemi temang koba agi taret kümdaktsür, item menüngdakba taret ajak endoker tasemtepdaki ayir. Kodang menüngdakba mapa nung asenoki nokdaker, Tsüngremi mepelar, ain adoker. Sarasadem mapang auyadaktsüba nung pelaa malir. Asen taküm-i pa uludaktsütsü asoshi süngyanglu mapatem asen taküm nung melidaktsütsüla (Isa. 2: 17b, 18).

Nai mulungba timtem tokrong ajak aremstsü, Ne taochi kua.

osang agi ajak ayimjemtsü: WEA

nükjidong ataloktsü atema Paraguayan Stuttering Association CEO aser Tir, Cinthia Hieber-i WEA dang iba wadang atema la ama m a t a m a b e n s a r t e m - a züngoktsü mepishia liasü.

World Evangelical Alliance (WEA) 14buba mungdang ya Sarang Church nung ayongzüka liasü. "The Gospel for Everyone by 2033" omen nung ajemdaker senden agi.

WEA nung Regional alliance 9 aser national alliance 161 densema lir aser iba tentet nung Evangelical Khristan züngsem million 600 dak tali lir.

Iba senden nung WEA Executive Chair, Rev. Shana-i telongjem nung mangdang tasen yur inyaktsü ayongzüka liasü.

Yisu Khrista tasü nungi tanaben shia aruba aser Pai nütsüngtem nem tenyaba wadang tuluba nungloktsüba sülen küm 2,000 abensaba mongji 2033 küm amongtsü, aser iba dak sendakba nung

Rev. Shana-i, "Iba mungdang ya senden ka dangbo masü. Iba ya kibong longjemba lir, sarasademtsü mapang ka, shisadangtsü mapang ka aser taruba kümtem nung WEA-i alima nung Arogo tenzüksü atema imdangjema shisadangtsü mapang ka lir," ta metetdakja liasü.

Iba mungdang omen "The Gospel for Everyone by 2033" ya Efesa 2:13-18 nungi agitetba lir. Taruba küm 10 tsüngda Khrista osangtajung angashidaktsütsü atema ajak nem maongka agütsütsü mangdang yur WEA-i inyaker.

1846 küm tentetba World Evangelical Alliance ya alima nung evangelical Arogotem aser organizations longjemtsü atema sabang ka lir. Evangelical alliances, networks aser commissions-i local Arogotem tashi itdaktsütsü, tamangba yimsü temeden ajungkettsütsü aser Khrista temang nung ka küma longjemtsü atema inyaker.

AO OSHI ANGAZÜKDAK:
TANÜ ANGAZÜKTSÜBA OJANG



Tzünoktang

- (n) tzü yima alua aliba nokdangba (dam)
* Tzünoktang tulu yanglua electric light adokdaksür.

Tzüozü

- (n) tzü nung aliba ozü tapu ka (crane)
* Tzüozü ya tetsüng aser tekong talang lir.

OLONG PAITEP # 7414

1				2				3		
										4
		5	6					7		
8				9		10	11			
			12							
13		14				15				16
17		18		19		20				
	21									

TIPIEN

1. Tepolung - (10)
5. Tazüngtsü züluba - (5)
7. Ozü tapu ka - (3)
8. Anguba shilem - (5)
10. Tera / Ishika - (3)
12. Teben sobutsü - (5)
14. Te _ _ _ gjem - (3)
15. Moapu nung chiyimba shiruru - (5)
17. Terok nungi adokba - (3)
19. Temela masü - (5)
21. Tesünep - (10)

LANGTSÜNGLEN

1. Tepungba masü - (5)
2. Taleptsü yin - (3)
3. Rong tapu ka - (3)
4. Yimsüsüba kümsük - (4)
6. Mangyimba mapang - (5)
9. Meimchir rongnung telemsa - (3)
10. Atentsü asoshi mejemba - (3)
11. Ana meta - (5)
13. Inyaktet - (4)
16. Sapisayang - (5)
18. Tashi balaka - (3)
20. Shishilembadang amshiba - (3)

OLONG PAITEP # 7413 TELANGZÜBA

TIPIEN :

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER MA

ICC title timba abenba team



	TOTAL	MEN	WOMEN	U19 MEN	U19 WOMEN
AUSTRALIA	27	10	13	4	0
INDIA	16	7	1	6	2
ENGLAND	9	3	5	1	0
WEST INDIES	7	5	1	1	0
PAKISTAN	5	3	0	2	0
NEW ZEALAND	4	2	2	0	0
SRI LANKA	3	3	0	0	0
SOUTH AFRICA	3	2	0	1	0
BANGLADESH	1	0	0	1	0

Meghalaya CM Conrad-i Northeast longjemtsü ayongzük

Guwahati, Tsüklai/February 13 (Agencies): Assam Assembly elections agitsü mapang tonga arudang National People's Party (NPP)-i Haflong constituency nungi Daniel Langthasa toktepkdaksütsü osang metetdaksüogo.

NPP-i Assam kübok Dima Hasao district nung assembly election indang campaign tenzükogo.

Iba sentong ya 'One Northeast' omen nung ajemdaker Maibang nung ayongzüka agiogo.

Sentong nung Meghalaya Chief Minister & NPP National President Conrad K. Sangma-i Tipra Motha Party lennir aser Tripura chuba jabaso Pradyut Bikram Manikya Debbarma den külemi sabang ka nung shilem agia liasü.

Iba sentong nung Daniel Langthasa lenisüba kübok nisung meyrjang ka temai NPP nung aden.

NPP-i Assam assembly elections atema candidate list ano mesangdong saka Conrad Sangma-i Haflong Assembly constituency nung NPP candidate ji Langthasa asütsü ta yimjak nung metetdakja liasü.

NPP-i NDA nung adener anungji Haflong nungi BJP candidate alitsü asü koda ta osangbeneri asüngdangdang "NPP-i political maitsü aser tangatetba balaka ayur" ta Conrad-i langzü.

NPP-i election nung shinga den-a tesentaktep meyui tokteper aser Haflong nung ozü candidate ka alitsü ta paisa shisem.

"Kasa mapang NPP-i political party shinga anema menokdaker. Onoki election result anguba sülen nübortem taginüba ama lemtettem agitsü" ta Conrad-isa metetdaksü.

Conrad Sangma aser Pradyut Debbarma nati Maibang playground nung jembidang Northeast nung kin balala tsüngda amalitep alitsü ayongzük.

Kin balala indang ali temetentem, maitsü aser tarutsü kümzüka ayutsü asoshi longjemtsüla. Northeast nunger longjemba ajanga tangari telemsa adoktsü mapa noktangtsü ta tenatisa metetdaksü.

Local administration-i Maibang nung pa indang helicopter anentsü temelaba magütsüba atema Conrad-i

aitsü. Iba ya "petty-minded politics" lir aser democratic tangatetba nung political party shiai talenba melii campaign asütsü temeten agüja lir ta pai ashi.

"Onok helicopter nung marudaktsünüra, lenmang ajanga arutsü. Nüngdak dang süra onok tetsüng agi arutsü" ta Conrad-isa metetdaksü.

Daniel Langthasa-i NPP nung adenba sülen jembidang "iba rally ya Bir Shambudhan Phonglo asüba bilemtetba anogo den külemi agir" ta ashi.

Iba anogo ya onoki Martyrs' Day ta ser amunger. Phonglo-i ali, sobaliba aser maitsü kümzüka ayutsü atema British yimsüsüba anema noktak ta pai ashi.

"NPP-i terenlok mapa, industrial projects mesüra infrastructure expansion anema menokdaker. Ajisiüka yimdaklir dang nungi No Objection Certificates (NOCs) meshir ali ayokba mesüra agütsüba aser Sixth Schedule alema inyakba magizüker" ta Langthasa-isa shisem.

"Onoki ozü ali aser temetentem kümzüka ayutsü atema raratsü" ta paisa ashi.

Mizoram minister Lalrinpuii-i Women Icon Award 2026 agizük

Aizawl, Tsüklai/February 13 (Agencies): Mizoram nung Health and Social Welfare Minister Lalrinpuii-i Women Icon Award 2026 agizükogo.

Iba sempet ajanga Mizoram nung senotsü peria meliaka public healthcare tashi aittsü merangba kuli agütsür.

Achievers' World aser Indian Achievers' Forum ajanga February 11 nü New Delhi nung sentong ayonga agidang iba sempet agütsü. Iba summit ya "Viksit Bharat 2047 through Comprehensive Socio-Economic Development" omen

nung ajemdaker agi.

"Iba naroküm ya kija agi masü saka health ketdangsürtem aser frontline workers külemi yaritepa inyakba ajanga angur" ta Minister Lalrinpuii-i ashi.

"Mizoram nung health aser nutrition maparen tajungba akümtsü asoshi tesentaktep takang nüндaker, kechiyong linük nung corporate social responsibility (CSR) funds tajemtiba anguba state tem rongnung Mizoram dena lir" ta laisa ashi.

Minister Lalrinpuii-isa

corporate houses dang state sorkar den tesentaktep ayutsü ayongzük.

Healthcare infrastructure, maternal & child health, aser nutrition programmes nung yariba ajanga nüngdakba nübor aika ajangzüktsü ta laisa shisem.

La lenisüba kübok Mizoram Universal Health Care Scheme tenzükba, Mission Viksit Bharat kübok mapa inyakba aser Mizoram nung lowest infant mortality rates asüba ajanga iba sempet angur ta Minister Lalrinpuii-isa metetdaksü.

Arunachal nung 22nd National MTB Championship amunger

Itanagar, February 13, 2026 (Agencies): Arunachal Pradesh kübok Roing town nung 22nd National Mountain Terrain Biking (MTB) Championship tenzükogo.

Iba sentong nung state 29 nungi elite riders 512 tashi shilem agir.

Anogo pezünü national championship ya Arunachal Pradesh nung tang mezüng atema agir aser Arunachal Pradesh Tourism Minister Pasang Dorjee Sona-i lapoktsüogo.

Iba sentong ya February 12 nungi February 15 tashi amungtsü aser India nung cyclists tajungtibatem adenshia lir. Shilem agirtem rongnung Indian Army aser Indian Air Force dena lir.

Cycling Federation of India (CFI) kübok Arunachal Cycling Association-i iba sentong ayonger aser age groups aika

nung men's aser women's categories lir.

"Iba sentong ya Arunachal Pradesh atema tongtipang alizüng ka lir. Arunachal Pradesh-i national-level athletes 500 tashi adenshidaktsüogo aser iba asoshi Arunachal Cycling Association nem tenüngsang agütsür" ta Cycling Federation of India nung Secretary General Maninder Pal Singh-i ashi.

22nd National Mountain Terrain Biking (MTB) Championship tenzükba sentong nung Guest of Honour ji Nagaland Tourism Minister Temjen Imna Along liasü aser Pasang Dorjee Sona-i Chief Guest ama aden.

"Arunachal Pradesh ya 'heaven on earth' lir aser adventure sports atema lenmang aika sadema lir. Alima nung temulung agütsüba saisapongtem rongnung cycling ya temaba jenjang nung lir aser

Arunachal litsü ya biking destination ka akümtsü" ta Along-i ashi.

Arunachal Cycling Association nung Vice President Wangdi Dorjee Khrimyey-i Cycling Federation of India dang host state asütsü atema Arunachal shimtetba asoshi pelaba metetdaksü.

Khrimyey-isa local MLA Mutchu Mithi aser Department of Youth Affairs ajanga yariba atema pelaba shisem.

Iba asayamung nung shilem agirtem anenzükdaksütsü atema Arunachal Cycling Association-i Roing nung Greenfield Games Village lapoka lir.

Punjab, Jammu & Kashmir, Manipur, Mizoram, Gujarat aser Tamil Nadu state tem nungi cyclists aser coaches-i Arunachal Pradesh tobur ajung aser litsü atema tenüngsang agütsüba metetdaksüogo.

Bangladesh nung BNP-i sorkar akumtsü, ajaki Tarique Rahman dak rangloker

Dhaka, Tsüklai/February 13 (Agencies): Bangladesh yimtenren tsütsü temelenshi tasen ka arutsü lir, kong national election nung BNP-i two-third majority anguba sülen sorkar ka kumtetsü temulung lemlama lir. Küm aika tetokteper makai election agia aruba sülen iba election ya tesunep nung agia liasü.

Hokulbarnü BNP media unit ajanga X nung, parnok sasa yimsü sütettsüsa parliament nung menden peria nguogo ta ashi.

Election Commissioner-i vote züngdangba tatembangba ano mesangdong, saka unofficial results nungbo Parliament nung majority atema nüngdaka aliba menden 151 tashi BNP-i ngutetogo ta sayur.

Iba ya BNP aser par lenir Tarique Rahman meyipa shilangba mapang ka asütsü aser pa ya Bangladesh indang ato kilonser tasenba akumtsü jenjang nung lir.

Küm ana tejakdang Tarique ya pa sasa London nung jenoka liasü aser BNP züngsem aser bhukumer aika Sheikh Hasina yimli kübok tepuokdak yua liasü.

Kasa mapang BNP-i election nung takok tulu anguba sülen linük nung aliba nüburtem nem tenüngsang agüja liasü.

Parnoki iba takok benjonga rallies mesüra nüburtem senden malitsü ta ashiogo.

BNP-i par lenirtem, activists aser nüburtem dang aser parnok den sendaktepa aliba party tem dang linük tesem ajunga nung aliba mosques nung sarasademba nung shilem agütsü ayongzükogo.

Iba den külemi parnokisa linük yimchiyimjung aser

jangratema, pelatepa aser anema alitsü asoshi temples, churches, pagodas aser tekülem ki balala nung sarasademsü tamangba yimsü ajunga indang nüburtem dang ayongzüka liasü.

Dhaka nung aliba US embassy ajanga Facebook post ka nung BNP aser iba telok lenir Tarique Rahman den takok anguba tepela lemsatepa liasü. Hokulbarnü India Ato Kilonser Narendra Modi-ia Tarique Rahman den takok anguba tepela lemsatep. "Iba takok ajanga Bangladesh nüburtemi nü lenisüba nung tamang akaba sayur," ta Modi-i ashi.

Bangladesh terenlok asoshi India-i maneni yariteptsü, ta ashi. Pakistan Ato Kilonser Shehbaz Sharif-ia Tarique Rahman den tepela lemsatepogo.

"Asen tesendaktep tali tashi itshitsü asoshi Bangladesh lenir tasenba den külemi inyaktsü imlaa atar," ta pai X nung zülü.

Linük tesem balala nung voters million aika benjong ama pei vote agüja liasü.

Voting ya anepdang 7:30 ako nung tenzük aser nikongdang 4:30 ako tashi agütsür vote azüng tenzük.

Election Commission Secretariat ajanga aonung 9:00 ako meta vote agütsüba ya shilem 59.44 shi liasü ashi.

Asatepba aser tensa majungba tesem kar nung aliba dak alaka constituency 299 nung aliba centres 42,651 nung voting ya süngjema agia liasü.

BNP-i takok anguba ajanga Bangladesh nung küm 35 nung tang mezüngbuba tebur ato kilonser akumtsü.

Tebur ato kilonser tatemsa inyakba ya Kazi Zafar Ahmed liasü aser pa 1988 küm Hussain Muhammad Ershad yimsüsüba mapang Bangladesh PM kuma liasü.

Pa 1990 küm anenba sülen linük nung tematiba executive office nungya Khaleda Zia aser Sheikh Hasina melentepa mena aru.

Kaketshir temi anir longkak aita linük nung talangtiba ato kilonser inyaka alila Sheikh Hasina atsüngdoker ita 18 sülen iba election ya agia liasü.

Hasina'er Awami League ya iba election nung shilem magidaktsü aser linük nung Islamist party tuluba Jamaat ya tanabuba jenjang nung liasü.

Iba election den külemi referendum ka agiba nunga nüburtemi mulungsoa vote agütsü, koba ajanga linük nung yimsüsüba yimya melenshitsü.

"Kü dang nenoki temeim sayuba atema ni pelar," ta Tariq Rahman-i Dhaka nung Hokulbarnü sarasadem ka nung adenba mapang nüburtem dang ashi.

Tarique Rahman ya parliament nung tang mezüng züngsem akumer. Pa ya Dhaka-17 aser Bogra-6 constituencies nungi shim aser BNP candidates 212-i takok anguba nung pa ka lir, ta Election Commission ajanga ashir.

Jamaat ya tang mezüngbuba party tongti ka ama yimden amenoktsü asoshi toktepa liasü. Parnok alliance ajanga menden 77 angu aser yangji menden trok kaketshir temi anir aliba National Citizen Party-i ngua liasü, koba 2024 küm Hasina yimli anema longkak aйдang tenteta liasü.

ALI TAYOKTSU LIR
XELHOZHE nung Aoyim den sentakteba
aliba Ali 4 Pura dak tema lir.
Tasazük Mashii angutsü.
94360 02285 Rs. 250 per sq.ft
Contact : 9436404186 / 9612897620

Madagascar nung cyclone agi asür nisung 38 jungogo

Antananarivo, Tsüklai/February 13 (Agencies):

Hopta tetenzüklen Iba yimti aser linük yimtiba Madagascar nung Cyclone Antananarivo sendaktepba Gezani arua kongshia nisung 40 lenmang tongtiba tesem balala jungnüa süogo aser nisung nung raksaba yong teyari oset 12,000 dak tema pei ki yutsür tesem balala nung jenoka lir, aser Mozambique nung iba yipru arutsü renemshiba mapang lir.

Madagascar indang National Office for Risk and Disaster Management (BNGRC) ajanga Brehostibarnü ashiba agi, nisung 38 asüba jangjaogo, nisung trok samar bushir aser nisung 374 yiru.

Gezani yipru yagi Indian Ocean nung aliba Madagascar asetkong linük anüolen Toamasina yimti nung Mongulbarnü kongshia mopung ya ghonda ka nung kilometer 250 tashi kera aon.

Madagascar indang lenir tasenba Colonel Michael Randrianirina-i national disaster sangdong aser alima ajunga dang temeim sayutsü ayongzüka iba cyclone yagi Toamasina aser temeket tesem shilem 75 shi raksatsüogo ta ashi.

Nisung 500,000 aliba yimti nung mopung sashia aonba ajanga süngdong laor aliba aser ki kilem shizüka bener orr aliba noksa tem nguogo.

Iba cyclone nung nisung aliba ki 18,000 dak tema samatsü aser 50,000 shi raksatsü mesüra tzü agi metsüngbang, ta BNGRC-i ashir. Nisung aika ki chirepba nung asü, kechiaser aika ki nungi ainshitsü ashi.



Dhaka, Feb. 13, 2026 : Bangladesh nung February 12, 2026 nü parliamentary election agiba nung Bangladesh Nationalist Party (BNP)-i takok tulu nguogo. Noksa nung BNP tanishir Tarique Rahman-i pa indang vote agütsüba angur, shiba Bangladesh ato kilonser akumtsü.

Mongsen Longkumer tushia agizükba sentong agi



Mongsen Longkumer tushia agizüker kelen Mopungchuket Putu Yimsüsürtem den tangokba noksa.

Mokokchung, Tsüklai/February 13 (TYO) : 5buba WAKO India Open International Kickboxing Championship New Delhi nung linük 25 nungi shilem agir 3000 tashi adenshia February 4 nungi February 8 tashi New Delhi nung tetoktepba akadang Veteran 84 Kg Category nung Mongsen

Longkumer-i Egypt nunger Salah Fathi Mohamed Azzazi kokteta Gold Medal nguteta liasü.

Mongsen Longkumer iba takok khonang bener shilangtang tanü pa tasoyim Mopungchuket nung Mopungchuket Village Sports Federation (MVSF)-i ayongzüka pa tushia agizükba

sentong ka agiogo.

Pa aruba mapang Mopungchuket yim süngküm nung pa agizüka takok anguba ken tenloktsü aser MSM complex nung iba tetushi agütsüba sentongji agia liasü, aser sentong nungsa Mokokchung District Martial Arts Association nungia arua dena liasü.

Mokokchung district-i Nagaland Veteran Football asayamung kokogo



Dimapur, Tsüklai/February 13 (TYO): Mokokchung district-i 13buba Nagaland Veteran Football asayamung kokogo.

Final asaya nung Mokokchung district-i goal 1-0 agi Kohima district koka liasü. Anogo pezü asayaba

asayamung ya February 10 nü nungi Niuland District kübok Old Showuba yimtsü, local ground nung kanga takok ngua asayaogo.

Inter district tournament ya Nagaland Veteran Football Association (NVFA)-i ayongzüker aser "Kick in football,

Kick out ism" omen nung ajemdaker asaya liasü. Taküm ajak senteper iba asayamung nung district ter-i shilem agia liasü.

Hokolbarnüsa Wokha district-i Zunheboto district koka team ana ya tasembuba aser pezübuba jenjang nung asayamung tembangogo.

Asayamung shibangba sentong nung anküp o jembiba mapang NVFA tir Anthony Ngullie-i, asayamung tepeyong sportsmanship tajung sayuba atema asayar ajak dang kanga pelaba lemsatep. Paisa asayamung kanga takok ngua ayongzüka agiba atema asayamung ayongertem nema tenüngsang agüja liasü.

Maneni Nagaland Veteran Football Association tirisa takokertem nem takok marok aser medal lemja liasü.

Copa Del Rey nung Atletico Madrid-i goal 4-0 agi Barcelona akok

Tsüklai/February 13, 2026 (Agencies): Brehostibar aonung Copa del Rey semi-final mezüngbuba leg nung Atletico Madrid-i goal 4-0 agi Barcelona kokogo.

Asaya tenzüker mapang tatsüka tsüngda Eric Garcia-i own goal ka idaktsüba sülen Antoine Griezmann, Ademola Lookman aser Julian Alvarez nungeri goal kaka idakja Diego Simeone-i aniba team yagi iba asaya ayong ayonga koka liasü.

Goal aika chir asaya mekoki aliba mapang asaya tatemtsü lia Garcia nem red card agütsür asaya nungi tugudaktsüba ajanga parnok jenjang ano kanga mejungi aküm, aser March 3 nü Camp Nou nung tanabuba leg atema mapa tasak kümogo.

Asaya tenzüker minute tenet tsüngda Garcia-i back pass ka agütsüba ground memedemba ajanga joka or Joan Garcia-i mazüokteti goal idaktsü.

Iba sülen Griezmann-i Atletico pur atema tanabuba goal idaktsü. Team-i ball kanga junga belenshia aluba sülen Lookman-i tasembuba goal idaktsü. Alvarez shiba asaya 11 tashi goal ka danga midaktsü asaya aruogo, pai goal pezübuba idakja liasü.

"Onoki asaya mezüngbuba shilem kanga junga asayaogo. Onok indang fan temi iba ya nüngdaka liasü ta bilemer," ta Simeone-i ashi.

Asaya nung Barcelona puria goal idaktsütsü atema

maongka ngutetogo. Fermin Lopez-i crossbar nung ball ka metsüoktsü aser Pau Cubarsi-i goal ka idaktsüba VAR review agiba sülen offside aliba nguteta goal magi aküm. Iba goal magi kumdaktsüba ya Hansi Flick-i ashishiogo.

"Iba goal kechiba offside asü iba indang kuli aginer. Parnoki kechi anguar nibo mejangja," ta Flick-i Movistar dang ashi.

La Liga akoktsü timla sama aoba den Champions League-a akoktsü mejangja akümba mapang Atletico asoshi Copa del Rey akoktsü timla tuluba lir.

Tanga semifinal ka nung Real Sociedad-i Bodhbarnü goal 1-0 agi Athletic Bilbao kokogo.

T20 World Cup: Zimbabwe-i run 23 agi Australia kokogo

Tsüklai/February 13, 2026 (Agencies): Hokolbarnü T20 World Cup nung Zimbabwe aser Australia na asaya nung Blessing Muzarabani-i run 17 agütsür wicket 4 agia kanga junga asayaba sülen parnoki run 23 agi Australia kokogo.

Asaya akoktsü atema run 170 nüngdaka run arishi tenzüka sülen Australia team-i asayar 4 out ser run 29 dang yangluteta parnok timtem nung liasü, saka Matthew Renshaw aser Glenn Maxwell na senteper run 77 yanglua team jenjang Yanglushitsü.

Asaya akoktsü atema Australia-i tatembangbuba over ana nung run 34 nüngdaka liasü, saka Renshaw (run 65) ball ti anunga lia catch out süatokba ajanga parnok jenjang raksa.

Iba asaya makokba sülen Group B nung Australia team-i Zimbabwe aser Sri Lanka na point ana agi memenepi lir.

Mezüng batting amenba

sülen Zimbabwe-i team asaya meyilongi tenzüker. Parnok rongnungi opener Brian Bennett-i out mesüi ball 56 nung run 64 yanglua team len ani.

Tadiwanashe Marumani-i ball 21 nung run 35 aser Ryan Burl-ia ball 30 nung run 35 yanglua team nem teyari agütsü.

Zimbabwe skipper Sikandar Raza-ia ball 13 nung run 35 yanglua asaya tatemlen kanga junga asayaogo.

Asaya akoktsü atema kanga tasakbo masütsü ta bilema aliba mapang Muzarabani aser Brad Evans nati Josh Inglis, Travis Head, Cameron Green aser Tim David nunger ajak out sütsüba sülen Australia team timtemi ai.

Renshaw aser Maxwell nati asaya jenjang yanglushi, saka Maxwell ya run 31 yanglur aliba mapang out süatok. Asaya nung Australia nunger asayar aseme dang run ter dak tema yanglua liasü.

STATE OSANG :

Tapak 1 nungi...

Maova yimtsüng nung ki o...

Nagaland nung iba ama ali kimong tsütsü mangatettep ya ajaklen lir. Itemji jembishinüa, village councils, customary law aser district administration ajanga benteter. Nisung meyrirjang junga ayongdener yimtsüng ka maka mangatettep nung kuli kodanga magütsü. Nija tsüngta mangatettep adokba nungi kin tsüngta mangatettep kumdaktsüba ya tapi agi aser lendong lir, ta ashi.

Iba lendong nung Bolero asem, Wagon R ka, Bikes pezü, Scooty pongu, nija ki asem, Mobile phones 20, Gypsy ana, JCB ka, Maruti 800 ka aser Swift ka raksatsü aser Dumper Truck ka, Santro gari ka, council guest house ka, lenmang nung aliba dokan 17, Community Hall ka, Council office ka, Council youth office ka rongdoktsü aser village council indang chair 50 raksatsü, ta ashi.

Item ya mangatettep adoka alir indang masü, item ya yimdaklir indang ki, takum chiyongdak aser rongsen liasü.

Iba ken o nung Chathe Prayer Centre tenüng amshitsü merangba ya tim masü. Sarasadem aser tamangba yimsü dak sendakba tesem ka iba ama mepetmesü atema mamshitsüla. Mangatettep tuluba akumba nung temeshi tesem mamshitsüla, ta ashi.

CPO ya mezüngbo Chakroma Union ta aja, koba

Subedar Khupjalet Kuki mezüngbuba chairman ama tenzüker. Iba ya ajanga tesüba mapang kin ana tsüngta tesendaktep tajung aliba sayur. Anungji iba ama lokti tetet ka ki o jen raksatsütsüa lokti ayondenba sapang ka kumdaktsüba ya tebilemtsü tulu lir, ta Vaiphei-i sangdong nung ashi.

Maova-i nisung telok yokba ajanga parnoki obendang agütsütet asü? Ki aser dokan raksatsüba ajanga parnoki yimjung tashi itshidaktsü asü? Telangzübaji tejangja lir.

MVC-i iba mapa inyaker ajunga anema FIRs benokogo aser indang-indanga mapang telatet nung bushisüngdanga jangjateter ozü yimtsüng anir amaker nem tapet temerenshi agütsütsü, ki o jen raksatsüba atema compensation agütsütsü, tarutsü nung iba ama tensa majurutsü mechi security yoktsü akhanger, ta ashi.

Maneni, Medziphema Sub-division kübok Maova yimtsüng nung February 13, 2026 nü ajungbena tia maka lendong ka atalok. Tang tensa azüoka lir, security forces yoka lir, akhi ama gari jajar aser nüburtem dang yimjung nung alitsü aser pei sasa ozüng mamshitsü ayongzüker, ta Dimapur Police sangdong ka ajanga ashi.

BILEMDANGANG

"Taküm nung tamakok aika ajangshitsü saka tamakoker ka teküm."